

Suppa, rosbif e baguosets per fr. 1.20

Da prezis e salaris d'avon 100 onns

El *Taschenkalender für Schweizer Wirte* digl onn 1912 sedrova il redactor da rimnar sia muntanera malamein spatitschada: certins dils ustiers sefutrien dils prezis minimals ed auters offereschien paun gratuit a lur hosps ... Dacheudenvi hagi il paun da vegnir quintaus da tuts, numnadamein cun 5 raps la purziun. In ustier che sappi buca far quen ton semuossi clar e bein sco ignorant e seigi sin buna via dad ir alla malura, anzi, el discrediteschi era aunc igl undreivel stan dils ustiers. Insumma, al hosp plaigi il paun gratuit gnanc stel, quei seigi sc'ina almosna; el fussi senz' auter canlis da pagar. Sch'in pasterner dessi siu paun per nuot, fussi el enteifer dus dis sut ugau – ni aunc pir. Pigl ustier possi valer pli u meins il medem.

Tschaveras da fiasta per fr. 3.-

Mintga tratga hagi d'haver siu prezi (minimal) che stoppi vegnir respectaus strictamein. Pli pauc astgi negin pretender, insista il redactor dil calender dils ustiers, dapli senz' auter. Bein, bein, gliez dependi dallas cundiziuns localas. Tenor

la gliesta dils prezis, che sesanfla alla fin dil calender, cuosta in consommé minimum fr. -.40 e la suppa dil di fr. -.30, ferton che la carn bov va da fr. 1 la purziun (gulasch viennes) entochen fr. 4 per in steak Chateaubriand. Las hutlas cun sosa per fr. -.80 vi jeu buca tralaschar da menziunar. In barsau nuorsa cuosta fr. 1.20, in barsau tschut 10 raps dapli e narunchels piertg fr. -.80. Quels prezis valan per las carns senza garnitura: truffels ord l'aua fr. -.25 (truffels barsai fr. -.30 e frittai -.50), arveglia e bliuschas fr. -.50 e crut asch fr. -.30. Las salatas ein tuttas entuorn fr. -.40 ed ils desserts in franc, pauc si ni giu.

In directur vala 15 concierschs

Ferton che las tratgas han lur prezi minimal, ein las pagas indicadas el calender da 1912 matei da considerar sco maximums. En scadin cass astg' il directur pretender in salari mensil da fr. 300, 15 ga dapli ch'il conciersch. Ils schefs dalla recepziun e dil service san quintar cun pagas da fr. 120, ina cuschiniera cun fr. 50, in camerier cun fr. 30 e sia collega feminina cun



Sala da spisa dil «Palace-Hotel» a S. Murezi, l'entschatta dil 20avel tschentaner (foto C. Padrutt).

fr. 20. Quellas pagas fixas ein tuttas quintadas senza las bunamanas che survargavan savens la paga fixa. Tut secund con cuntenza e generusa che la clientella era, deva ei aunc in brav schliep sissu. Per cletg!

Musicants e cavals

La musica da bal custava fr. 17–20 per um, a caschun da nozzas schizun fr. 20–25. La musica da tabla durant las tschave-

ras pagava buca ton (mo fr. 6/musicist). La paga mensila fixa d'in conciersch fadgiava in musicant pia en ina solia sera da ball! – Era las tariffas per cuost e dunsena dils clients da quater combas mauncan buc el calender dils ustiers: la purziun fein ei fr. -.40, la raziun aveina (4 liters) fr. 1. Ina «pernottaziun» en stalla, senza solver ni auters survetschs cuosta fr. -.50 per tgau. Sin tgei moda ch'ils cavals devan lur bunamana, ei buc enconuscent.